

SANT ALOI DE CUJO



1977

Moussu lou Capitàni de Sant-Aloi.
Moussu lou Curat,
Moussu lou Méro,
Moussu lou Counseïe Generaou,
Moussu lou Deputa,
Mei Bràvis Ami,

Vue! es pas un deis autre. Es la fèsto de noun de Sant-Aloi, es la fèsto populàri de tout lou villàgi. Noun de Sant-Eloi e de Cujo, parlaren dei Cujen, de se ié parlaren tambèn daou cadre merivihous que fan à nouestre villàgi lei bèlleï couelo de pin. Rèn que d'èstre aqui agroupa davans Sant-Aloi fa bèn vèire que lei Cujen fan tóuti qu'uno souleto e memo famiho.

Tóuti lei famiho de Cujo ensèn qu'acò es béou.

Que soun bello nouéstri famiho de Cujo, es à-n'elei que devèn tout. Es élei que nous an educa, es d'èu qu'avèn eirita.

Un eiritàgi qu'es pas toujours riche de saou, mai riche surtout de vertu e de fe e d'abord la vouestro de famiho, Moussu lou Capitàni de Sant-Aloi, vous que sias de la famiho Davi, lei Davi que fuguèron de paire en fiéu, lei manichaou daou villàgi de Cujo e d'Aubagno avèn counoueïssu vouestre pero Edouard Davi, qu'avie éou tant d'amour e de talènt, coumo un culte pèr lou chivaou. Lou chivaou em' éou, l'ome e la bèsti èron dous coumpan de vido que tóuti lei dous, si coumprenien si sentien e s'aimavon.

Dins la mentalita d'un Cujen, la famiho es uno cavo que coumpto. Es coumo de l'enfant crèisse e grandi, que fa l'aprendissage de la vido, que s'embaoucho en éou l'amo que plus tard s'amadurara. La famiho es deja la soucieta.

L'ome d'aro soufris de la soulitudo. Lou païsan que travaïo dins soun bèn emé lou traitour es tout soulet, avans poudié parla à soun chivaou, aro sa voues es aclapado pèr lou bru daou moutur e parié pèr soun vesin que travaïo coumo éou dins lou bèn. Mai venguè la recampado e dins lou meme oustaou si retrovon doues, tres generacien que rèston ensèn dins lou meme amour dins l'estimo reciproco, lou bouonur de l'un fa lou bouonur de l'aoutre. Cadun paou parla, discuta, embaoucha soun idèio, soun plan, lei parènt e leis enfan.

- *Dis-moi grand-père, qu'est-ce que c'est que l'écologie?*

- Se ti crèses que lou sàbi iéou?

- *L'écologie c'est la science du rapport des hommes avec la nature.*

- Ah n'es poudès parla de la naturo, té! regardo aquélei man, coumo en travaïa! Ah! se leis avias visto, aquélei man de païsan, de carretié. Coumo èron gaouvido macado e rugouso, l'ome n'en fasié saouta emé soun tranché, de moucéou de péou duro! léou leis ai visto aquélei man aourien vougu lei beisa.

Es ansin qu'èro la famiho de Sant-Aloi. Lou Limousin es sa patriò, es d'un oustaou bèn parenta, sa mèro Santo-Teregìo l'abaris dins la pieta.

Es aqui dins aquéou recàti beni de sa famiho, que lou Bouon Diéou samènè dins l'amo de l'enfan Aloi, lou germe que n'en fara plus tard un bouan manichaou, un ministre capable, un grand e sant évesque de Franço.

Que saran nouéstris enfan ?

Bessai devendran coumo Sant-Aloi ministre, évesque, que saou proun que la famiho leis ajudè e leis endraiè dins lou camin daou travai e de la pieta.

Quand si parlo deis enfan es à l'aveni que sounjan, l'aveni de Cujo!

Vous n'en pàrli vuei en exploitant lou cadre naturéou de sei couelo de pins.

Cujo, o mai Cujo-lei-Pin! Que béou noum que pourtan!

Lou numero de la poste treize mille sèt cent quatre-vingt *Cuges-les-Pins*. *Non pas Cuges-les Vallons, mais les Pins.*

Sus l'etiqueto de la boutiho de vin de la coopé que l'a de pinta sus lou blasoun: tres pin d'Alep? Aqui permetes-mi uno cascadeleto ou galejado: parèis que dins un endré dins la boutiho de vin li meton uno gouto de pego e lou vin es alor plus faourt e tóuti soun empega, la qu'à Touloum que la pego pego pas. Aquelo empego!

Tant es vrai que Cujo e lei pin noun poudon se dessepara, que lou pin nous a marca e que dins tóuti Cujen l'a une amo de fourestié. Mi rapèlli d'un ome que quand passavo davans lou gros pin de la Roco, s'arrestavo toujours un long moumen en baissant leis uei, devié sounja à la grandour d'aquéou bel aoubre, d'aquélei pin qu'expandisson pertout sei branco ramado e verdejanto, d'aquéleis aoubre que lei cigalo li vènon canta e leis aoucéou nisa, d'aquélei pin qu'adaout sus la plus aouto branco raquinquiha l'esquiraou (o que chale pèr lou cassaire) rousigo la pigno, en

boulegant pèr darrié sa douço e bello coua. M'es d'avis que lei pin a coumo l'ome, es un èstre vivènt, coumo éou nèisse, crèis e grandis, s'agrandis, si fa vièi e more. Un aoubre mouart pecaire! mai es un cadabre qu'es sènso séouvo, sènso sang. Un pin que brulo pecaire es un ome que brulo...

Coumo l'umanita qu'a counoueissu lei gran fléou de la guerro e de la pèsto, la couelo elo counoueis lei grand fléou daou fué. Es sinistre lou fué, es uno cavo afrouso que de vèire uno brulado, o quet espetacle asfraiant, aqui sus de kiloumètro uno brasado, uno flambour espouventablo que, empurado pèr lou vènt que boufo, estènd de pertout sei flammo endiablado e lei pigno enflamado gisclant, peton coumo de boumbo e lei ramo flambejanto davalon de la couelo en cabriolo, en cabriolo de fué, visien apoucaltico, desoulacien de la desoulacien.

Qu'à l'aveni lou boues de Cujo retroubo sa béuta d'antan, coumo daou tèms de Gaspard de Besso que venié emé touto sa bando s'escoundre darrié lei riganéou pèr guincha lou passàgi de la mallo posto, daou fourgoun e de sei vouïajour, e si landavon sus e si landavon tambèn sus lei castéou de Juilhan, de Fouont-Blanco, dei Bastido, qu'acò èro Pinval.

Noun à l'aveni, lei boues de Cujo saran pas un recàti de bandit. Mai uno bello fourest, un parc nacionaou ou pas, un vertadié de paradis mounte quicon pourra veni si proumena, cassa, juga, canta béoure uno grosso bolo d'èr fres teta lou bouon la de la mèro naturo.

Mai pèr tout acò faire, avèn besoun de prega Sant-Aloi.

Qu'alargue la benedicien de Diéou sus nouéstri famiho d'abord, fin que lei famiho de Cujo aguèsson enca mai l'esprit souciaou, mai d'esperit de touleranço, de liberta d'educacien noun coumandado mai chaousido, qu'agon mai d'amour e mai de fe.

Sant-Aloi qu'a tout ajouda: lei carretié dins lou travail dei bèn e de la couelo, que nous ajudo à douna au boues de Cujo mai de valour.

Sant-Aloi que fuguè un sant tant populàri, un tant bouon évesque de Franço, que benisse lei crestian de Cujo, fin que lei béou proumié pagon d'eisèmple.

À l'ouro d'aro que la santo glèiso de Diéou es tant criticado, abregado, alor que lei capelan meme fan la cabriolo e que d'àutrei testard coumo d'ai voulon rèn chanja, que lei crestian de Cujo rèston toujours, la tèsto bèn sus leis espalo, en gardant lou camin tira emai large, emai plan, que fagon vèire à tóuti lou verai visègi de Diéou.

O mai qu'es beau lou visàgi de Diéou e qu'es grand l'amour de soun couar!

Amen

NDLR – Lou tèste es esta asata en fasènt lei courreicien dei deco, en apoundènt de pountuacien pèr rèndre lou tèste legible, qu'èro escri coume lou brave ome parlavo...

© CIEL d'Oc – Abriéu 2011